

DS  
793  
K42L856  
1740  
v.5









龍虎山志卷十三

妙正真人婁近垣三臣重輯 徒惠遠謨虛中校

藝文

詩四

唐

張天師草堂

常建

靈溪宴清宇傍倚枯松根  
花藥繞方丈瀑泉飛至門  
四氣閉炎熱兩崖改明昏  
夜深月暫皎亭午朝始暾  
信是天人居幽幽寂無喧  
萬壑應鳴磬諸峰接一魂  
遂登仙子谷因醉田中尊  
時節開玉書宵映飛天言  
心化便



影日精焉累煩忽而舉霄漢寥落空南軒

弋陽溪中望仙人城

顧況

何草乏靈姿無山不孤絕我行雖云蹇偶勝聊撫節上  
界浮中流光響洞明滅晚禽曝霜羽寒魚依石髮自有  
無還心隔波望松雪

安仁港口望仙人城

樓臺采翠遠分明聞說仙家在此城欲上仙城無路上  
水邊花裡有人聲

龍虎山

吳武陵

龍虎山中紫翠烟青精顏色四時妍桃枝慣見花成實



瀛島宜聞海變田五斗米仙真有道一神樓藥豈無緣  
秋風吹綠茂陵草的的黄金飛上天

龍虎山

吳筠

道士身披魚鬣衣白日忽上青天飛  
龍虎山頭好明月玉殿珠樓空翠微

仙岩二首

王貞白

白烟畫起丹竈紅葉秋書篆文二十四岩天上一雞啼  
破晴雲

風呼山鬼服役月照蘅薇結花江暖客尋瑤草洞深人  
嚙丹霞



宋

孔鍊士話龍虎山之勝於其行因以送之

葉適

羣嶂倚天旁四環中峰受拱低伏蹲雲錦交陳紫團外  
却注彭蠡如傾奔道陵已去丹竈冷今代符行妖鬼靜  
孔師何事亦逃儒爲愛氷林雪蒙頂我居無山冬不雪  
只受虛空滿輪月子能作意肯重來更待墻東笋堪掘

仙岩

晁補之

稽天巨浸洗南荒上有千峰骨立僵民未降邱應宅此  
舉頭天壁有囷倉



遊仙岩次韻

曾鞏

塵埃黃髮換朱顏十載重來歎故關  
天上樓臺春寂寂洞中雞犬晝閑閑  
苔深尚識曾題石木老難尋舊戲環  
未斷凡心却歸去他年飛鳥會知還

龍虎山

王安石

灣灣苔逕引青松蒼石壇高進晚風  
方響亂敲雲影裡琵琶高映水聲中

龍虎山

楊南野

長陵楊柳茂陵花幾度朝鶯幾度鴉  
陸海蓬瀛秋滿野至今猶屬子房家



懷鬼谷山思真洞天

虛靖真君

思真洞兮雲水深道人居兮鬼神欽山花笑兮松竹陰  
岩溜潺潺兮千古音何時一造兮清神襟攀石蘿兮共  
笑吟

靖通庵歌

吾結草庵山之中旁人笑我名靖通都來方寸閒田地  
大包世界同虛空我庵非通亦非靖玲瓏八面無形影  
盈虛消息任天機庵內主人都不省有時風雪三冬天  
山前盡日無人烟頑空墨黑晝如夜庵中光耀長周圓  
有時風雷平地起山沈江湧流雲氣龍吟虎嘯萬形喧



庵內情緣無止起環庵松竹連天青冬不悴兮春不榮  
人來謾笑庵居苦徹骨貧來徹骨清清貧生理十分好  
翻憶朱門生餓殍君能認得自家珠終身豈羨他人寶  
庵似身兮主似心欲明庵主須叅尋驢胎馬腹河沙夢  
那知鐵鑛藏精金高著眼睛速下手只今覓取無中有  
言窮理絕妄緣空無毛獅子撩天吼庵前大厦皆蘧廬  
知音有幾同庵居若非拔斷懸崖手誰解伊邊認得渠  
閒中有樂無人識靜處工夫閒裏得自然妙用自然真  
向上神仙皆此出浮生短景甚悠悠一切庵壞便須休  
溥勸吾門諸學者不昧此庵須早修



得請還山喜元規遠近

喜見石渾淪忘言意獨真還尋石橋約一洗客京塵香篆丹爐靜詩篇彩筆新高霞不孤映攜手洞門春

和超然渾淪庵即事韻

自得逍遙趣從來樂靜居水邊紅杏小烟外翠篁疎有物真常應忘形內本虛人間役塵慮到此盡消除

渾淪庵成與元規聯句

作室觀靈境功成事若何

張

琴書消日月耕釣老烟蘿

石

爲羨雲蹤遠時將酒共過

張

東岩開玉洞西澗瀉銀

河

石

整珮思天柱觀碁悟爛柯

張

真情敦澹泊世業信



蹉跎石絕跡求無累澄心到不波張渾淪甘宴息真率

謝澆訛石塵穢千峯隔風流萬氣和張乾坤堪比壽鳥

兔任如梭石仙至不無識雀來信有他張正月上旬白雀數十羣飛

至此盤旋煮茶畱客話種藥救民疴石竹露延清蔭蘭

風動妙歌張閒尋仙傳讀靜把玉經科石大道猶衣袂

囂塵自網羅張有生如石火移世似燈蛾石欲入高仙

調母教下鬼張吮茅檐無一事時復動吟哦石

雲臺治

漢朝人與道翱翔是處遺蹤屬靜方烟外桃花非俗種  
風前柏實有餘香杖穿翠藹通深宵舟駕洪波入渺落



千八百年三十代雲臺空碧佩琳琅

仙岩寺

依然仙跡倚岩開真館何年竟草萊今日梵宮方得到  
舊時元雀也飛來一條澗水琉璃合萬疊雲山紫翠堆  
禪客夜深能共坐滿窗明月正徘徊

答虞太守遊仙岩

累年林下意何長岩谷風霜亦倍嘗俗客不曾交得到  
達人應未以為狂江亭昔造懷寧海石屋今居似瀨鄉  
誰擬上饒新太守却因朝謁到山陽

渾淪庵慶成



高齋忽已慶成功赤石蒼崖入眼中貞節由來拘世業  
稚川隨處是家風紅金匱隱書尤祕碧玉壺清酒不空  
崑閬歸期應可展我來時欲嘯歌同

還山

長年京國甚羈囚邱壑歸來始自由流水有聲如共語  
閒雲無跡可同遊猿依松影看丹竈雀與蘆花入釣舟  
如此棲遲良不惡紅塵何事辱鳴騶

鍊丹岩畱題

雀來松有客苔去石無衣黃金浮世在白髮故人稀

題濯鼎泉

并序



演法觀崇真之院一方池清泉不竭昔漢天  
師嘗濯鼎于此池故得名焉比即池傍作小  
軒書名以揭之庶幾幽光不泯靈境常清故  
申之以頌

幾千年浪碧澄澄對景難忘我祖情樂就也知曾借力  
軒成方見不辜名

庵居雜詠九首

甃瓦完齊土壁堅藩籬周匝沒疎穿人來謾笑無華飾  
風雨須教安穩眠

庵前桃李春爭開雪裏見花惟有梅莫謂枝稍有分別



根本自異非人栽

春蠶絲盡即成蛾秋燕雛成不泥窠山雉經時藏窟穴  
也能龍化入烟波

長松偃蹇不依林枝幹高盤千畝陰昨夜酒醒風雨急  
半空彷彿聽龍吟

南山雨過北山出昨夜月明今日晴雲氣自舒還自卷  
太虛萬古常清明

莫羨庵居景物清須知樂自苦中生山前盡日尋幽客  
多說荒蹊不可行

柴門雖設不曾開賓客從他自往還連日山寒聲影絕



蒲團危坐更安閑

晴日暖風時出遊  
冷烟淒雨便歸休  
雲還樵斧溪邊牧  
不似畸人得自由

鐘聲鼓聲朝夕鳴  
茶烟炊烟先後生  
雲衣霞珮栖山客  
兀兀窮年無一營

上清宮二首

白玉蟾

五日連陰霧雨昏  
驅車應有北山文  
慚無吏部回天筆  
爲我重開疊嶂雲

石溜涓涓水脉長  
野田冉冉稻花香  
相迎誰似山雲意  
更借松風十里涼



仙機岩

織就霓裳御冷風  
玉梭隨手化成龍  
天孫歸去星河畔  
滿洞白雲機杼空

轆轤岩

王文卿

天上霞開金井曉  
山中風引玉繩秋  
長江萬古汲不盡  
斷岸夕陽飛白鷗

仙棺岩

昔人騎雀上天去  
不向人間有蛻蟬  
千載玉棺飛不動  
空江斜月照寒烟

丹竈岩



丹熟仙翁白日飛千年雲月護岩扉山中老叟相逢說  
夜夜靈光燭紫微

杵臼岩

搗藥功成玉兔沈白雲常鑲洞門深黃糧不似胡麻好  
誰得當時悟道心

龍虎岩

龍虎丹成紫氣開空遺高石踞崔嵬何人長笑孤峯頂  
引得風雲動地來

仙桃岩

鸚鵡飛過瑤池水瑤池桃熟亞紅烟鸚鵡銜桃墮山下



等閑風日九千年

雞籠山

羣雞天上食琅玕遺下樊籠與世看  
幾點青山如聚米不知何處覓劉安

壁魯洞

神虎奇書太白藏金函曾此發龍章  
綠毛仙子歸何處野草幽花滿洞香

上清宮

洪邁

振策衝暮雲攜琴宿仙境松風生夜涼  
蘿月散秋影洞遠落猿聲溪清明  
霍頂中宵夢仙翁乘車停翠嶺獅子



身五色鸞鳳互相引上有朱旛幢金碧不可省風吹雲  
璈遍顧我忽如喑遺以丹篆文再拜豁心領明當謝浮  
榮飄然從結軫

應天山

文安陸子幽棲日張氏諸賢及執經自昔衣冠儀里閭  
至今詩禮擅家庭岩陰夏閣風泉白溪曲春疇雨稻青  
天上真人躡鳬舄移文休勒北山銘

應天山

陸九淵

我家應天山山高數萬丈上開園池美平林千萬狀山  
西有龍虎烟霞耿相望寒清漾微波暖翠圍前障天光



入行舟野色隨支杖吾黨二三子幽賞最清曠引興谷  
雲邊題名岩石上碧桃吹曉笙白雀驚春帳一笑咏而  
歸千載猶可尚

馬祖岩

文天祥

會將金錫破苔痕一片雲根鑠洞門山外人家山下路  
石頭心事付無言

仙隱觀

謝枋得

秋日閒十日緬懷秋山空烟霞固常態敗葉鋪山紅平  
生五大夫投老一秃翁相看各蕭索事付不語中二輪  
固代謝四季弭初終義霜素悽慘溫律復冲融相期保



歲寒木末回春風

上清宮

江萬里

瞻彼雲山蒼蒼相繆雲舒霞張谿谷險幽鳴霍在樹猿  
猱啾啾青松多風白露已秋仙乎曷去胡不少畱

張天師飛昇圖

鄭思肖

玉局曾經拜老君子孫今尚寶元文要知龍虎山前意  
但看空中數片雲

寄龍虎山道士孔野雲

薛師石

上清三十六院閣皆幽清漱齒泉新汲晞髮日始升自  
除燒墨竈晝夜誦黃庭所得異疇昔出山畏逢迎同當



知非年寄詩聊寫情

題小桃源

裘萬頃

半月池邊倚瘦藤望仙臺上岸烏巾塵埃一點不到地  
花木四時長是春載酒豈無好事者爛柯應有著棊人  
請君更種桃千樹準擬桃源來問津

龍虎山

易性中

雲氣蓬萊近山陰草樹香御風不知遠仙骨已清涼

元

靖通庵題張虛靜真人

趙孟頫

一庵裏外鎖青雲壁瑩飛瓊瓦壘鱗野鳥無心一聲磬



岩花有意四時春  
鑿開風月長生地  
占卻烟霞不老身  
虛靜當年仙去後  
不知丹訣付何人

舊志止載下半首  
爲江萬里作今照松雪集改正

霍歸亭

仙去人間有故亭  
四山林竹鬱青青  
隱居真誥傳千古  
玉局丹文役萬靈  
白霍歸來人換世  
黃雲翔集夜充亭  
步虛聲轉松風響  
思掬岩泉洗耳聽

先天觀

對此山水詠使人  
塵慮消沉茲構真  
館燕坐遠煩囂青  
林蔭戶牖素雲冠  
山椒飛淙和澗泉  
雜珮響瓊瑤焚香



玉女降長齋百靈朝仙道詎云遠清都亦非遙自嘆衰  
暮年頗費猿霍招安得謝簪笏從子以消搖

水簾洞

飛泉如玉簾直下數百尺新月懸簾鈎遙遙掛空碧

逍遙峰

茲石足逍遙下可坐百人豈徒木石居且與猿霍鄰

龍虎山仙岩聞雞鳴寄薛元卿二首

徐敏父

天雞三叫白雲中知有仙家住半空塵土恍然驚夢覺  
碧桃花落自春風



泛泛輕舟沂碧溪  
蒼崖萬仞有鳴雞  
可惜吾儂不同往  
便當著屐上丹梯

送吳真人謁告歸爲二親八十之壽兼降香名

山

許邁楊羲奕世仙  
木公金母共長年  
斑衣歸戲都君側  
絳節朝辭玉帝前  
去去青牛隨紫氣  
飛飛白雀繞香烟  
大椿自得人間壽  
八十從今到八千

張虛靖園庵扁霍歸次韻

袁 桷

招仙遊觀構亭亭  
萬疊松寒曉日青  
玉局講殘春換劫  
石臺丹在草通靈  
紅羊赤馬悲滄海  
白虎蒼龍儼大庭



爲愛子喬松霍美月涼時許夜淩聽

送薛元卿歸吳余時有上京之行

飄飄江海遊渺渺關河役燕鴻有相避客子無定跡南  
山火雲高北山雪新白想此六月時相顧各動色堠傍  
青松樹上有雙鵠翼愛君慎舟楫戒我專寢食擾擾行  
路難風花亂荆棘

先天觀

浩浩太古石雕鏤矜嵯峨瓊林化飛騫寶構通鬱羅矯  
首視三光空青相盪摩上隣列仙居西接瑤池柯玉蛟  
初受令鞭撻迴盤渦巍巍雙華表飛鳥不敢過元霍時



一來潛鱗靜無波心跡會虛湛神光隱鳴鼉緬彼巢居  
子凝睇佩女蘿天風入紫京百靈莫誰何朗言混沌後  
龍馬方負河視之杳不見嘉名表山阿冥思有至理熟  
視猶摩磋

送鄧師禹歸龍虎山

小帽飛花一寸輕舟流水三分落日獨歸洞口隔溪短  
笛猶聞

鬼谷岩

縱橫太古石短長千歲藤感彼岩居子獨飲古澗冰

寒月泉



曉汲寒泉清水月各在缶缶空不見月引水復在手

玉簾泉

截玉作明簾不知簾外事應有碧眼仙隔簾見人至

月岩

顧兔樂嬉遊入地不得騁化爲白玉泉彷徨返東井

丹井

金鼎祕寒泉真火彌不壞年深定飛騰子夜吐光怪

送毛真人還山

馬祖常

朱提仙印碧霞裳賜履承恩自上方雨洒石壇苔錦滑  
日穿油幌竹書光葉鳧此日還滄海漢霍當年下建章



琪樹萬叢芝萬本江南歸路水雲鄉

送史高士謁吳閑閑

貢奎

春水武昌船帆飛敬亭雨孤城厭喧囂聽此檣燕語揮  
手謝時人開胸散煩暑煌煌闕下書曳曳雲間侶真人  
紫霞珮執簡授璇宇攬衣願從之神交諒傾許霽雨沐  
霄容風微鵠初舉游心愜高明脫屣邁行旅懷哉會何  
時酌彼盈樽醕

送吳閑閑真人

蒲道源

天風吹衣雨浥塵盧溝曉別詩境新石梁雄據天下津  
羣峰迤邐西北垠草木點綴生精神驕馬駐足車停輪



紛紛追逐皆朝紳相與祖餞爲何人閑閑嗣師方外臣  
貌雖老氏心儒珍恩許還家壽乃親翁媪年皆八十春  
饒國啓封降絲綸上尊分賜光祿醇道傍見者咨嗟頻  
此行豈爲思鱸蓴觚稜遠瞻戀嚴宸青雲我亦忝致身  
先世贈典蒙深仁但恨不及生存辰因君此圖淚沾巾

應天山

虞集

象山何崔嵬先哲昔愛之循麓得清流良田屋參差似  
是桃源人雞犬相因依鄰鄰白沙曲奕奕丹牖施泠水  
自天來雜花散玕琪所以上方士悠悠係遐思丹霞炫  
金壁清露在茅茨海島陋徐福幔亭卑武夷仙者自有



道黃鵠時往來

寄賀吳宗師七十壽二首

開府希年正樂康聖恩錫宴在斯堂  
歲周三十逢熙洽年接期頤被寵光  
劍珮總從仙苑集簫韶還就洞庭張  
簪花當日今誰是試向雲籤閱舊章

舊德高年荷聖恩慢亭如宴武陵君  
松高能壽多深隱園缺來朝只暫聞  
千歲天邊觀霍髮五雲日下護龍文

山中七日陽和動遙禮三台過夜分

送張道士歸上清

白雲盱水上自古多仙人手攜綠玉杖  
頭帶白綸巾袖



中出風雨天上禮星辰歸來庭戶靜芳草自生春

送吳上卿歸安仁

雲錦溪上雪盈盈綵船歸去雙羽旌行過梅花一萬樹  
却登高閣看雲生

和天師韻

白髮高居古道山蓬萊雲氣隱垂環尚方偏識前朝履  
特進仍先法從班桃李成蹊春日滿風雲繞坐晝陰閑  
梅花舊隱元都觀紫陌紅塵有客還

題信州先天觀圖二首

楊載

高林褰翠氣虛谷散虹光道士皆騎虎仙人自牧羊澗



泉通地遠山嶺際天長戴子文爲記流傳示不忘  
四圍山不斷狀若碧芙蓉谷遠含風細崖深下露濃茂  
林藏虎豹陰洞伏蛟龍恍忽神人降浮空羽蓋重

招真觀圖

欲學無爲道來居小有天精神消物怪采色變風烟恬  
憺知天德虛無象帝先高風何特達古跡尚流傳地涉  
洪荒表山開混沌前谷幽疑鬼聚峰巧類人鑄疊起三  
重閣分流百道泉岩穿雷虎跡石冷逗蛟涎放浪曾無  
日遨遊未有年古經披覽罷毛骨爲惺然

送薛元卿歸龍虎山



金門詔下羽人歸欲向山中採  
蕨薇琥珀懸崖松樹老  
琅玕倚澗竹根稀高岩畜雨  
星辰濕古石涵雲徑路微  
養性可無軒冕累遊塵原不  
浣仙衣

送吳真人持詔寧親

范梈

垂楊十二門旦旦羅鳴騶千  
騎萬騎中孰是違世儔美  
哉吳夫子脫洒住丹邱氣涵  
群象動思與萬物周天馬  
出名駒逸態橫九州自從下  
地走但飲星河流明月落  
中江倒影射斗牛飄然持玉  
節去犯蒼山稠紫鳳把細  
華逶迤仙岩陬遂經三茅岑  
已登閣峰頭還家拜封君  
玉冊珊瑚鈎笑問遊子衣不  
獨五色優門懸朱雀旂坐



擁金明裘開筵浥芳醴魚觴進庶羞承顏開淑訓慰爾  
道路修爾歸奉天子萬歲更千秋番君大國壽賀老清  
河愁烟水三萬頃宮袍在扁舟荷花合古渡此處不夷  
猶雲錦雙鴛鴦悠悠戲汀洲東風長年來揚我闌檻幽  
白馬絡金羈奈此甚盛休儂家閤峰下霞竹敷稻疇  
集偃松雪青雲互綢繆自從干戈餘川岳秋蕭騷骨肉  
倚四海風雲擾吟謳聞君復此去浩蕩懷今遊罷酒黃  
鸝鳴高花艷城樓良辰難能別嘉會易爲酬至樂夫子  
行此行無滯畱

題祝道士龍虎山先天觀

揭傒斯



聞說先天觀重重絕壁環鳥啼青嶂裏花落白雲間樵  
子能長嘯居人識大還洞門無處認惟有水潺湲

送道士薛元卿歸江東

知君此去漸難招只在人間已廓寥市上有時逢賣藥  
山頭何處覓吹簫仙岩花落溪流滿鬼谷雲開樹影遙  
未必故山安隱逸海天涼月夜蕭蕭

雲錦溪棹歌五首

雲錦溪中雲錦鮮好在高秋八月天西蜀錦江那得似  
西湖潒水更須憐

纔過浮石是藍溪溪上青山高復低山中泉是溪中水



尋源直到華山西

藍溪南去到藍州水底  
嶄嶄石不流迴望朱宮  
雲霧裡白雲深處更高樓

揖仙亭下薛公橋紛紛抵暮更連朝  
惟有橋西楊與柳無情常繫木蘭橈

溪上層層雲錦山垂楊盡處是龍灘  
不是孤舟來逆上何人知道世途難

送毛真人還龍虎山

手綰銀章主祕祠翩然歸去忽如遺  
塵湖龍井雲間上鳳曲鸞歌月下吹  
香逐蘅薇深更入氣交梨棗靜偏宜



南屏風雨平坡雪爭似山中夢覺時

題桃源圖

并序

江右龍虎山南十里有桃源者劉王二尊師  
所闢也臨江范亭父爲之記予爲賦五言詩

十七韻

桃源非一處龍虎画難同內外關逾鐵高低石作叢黃  
幡青劍北紫蓋白雲東蟾影當霄迫峨眉抱月弓

六峯名

千重藏曲折四面削虛空地戶吟風黑天池浴日紅雪  
霜翻濺瀑雷雨瀉崩洪暗識猿啼遠晴聞鳥語工危龕  
三井祕絕澗九橋通江合仙崖怒山連鬼谷雄劉王開



闢後秦晉有無中時見看桃侶頻逢采藥翁丹臺寒漠  
漠琳宇氣熊熊濟勝非無具緣源恐莫窮烟霞俄變滅  
草樹杳蔥蘢四序何勞誌群愚倘擊蒙誰言武陵近十  
里上清宮

龍虎山

南溪流水是閩山北阻重岩出漢關自領名山司洞府  
別開真境近人寰池臺如在瓊花裏門巷多從翠竹間  
把酒題詩須盡日人生最樂是幽閒

送張真人歸上清

門戶京城晝嬾開初聞北覲却南回馮夷擊鼓乘龍出



王子吹笙跨霍來，囊裏天書明日月。匣中神劍闕風雷，  
回瞻魏闕紅雲擁。應在山中看早梅。

張真人象山圖

江左名山大象尊，遙瞻猶似哲人存。先生有道行天地，  
弟子環溪長子孫。孔李通家從古昔，神仙開府自淵源。  
豈徒世荷真人誥，更有分乘刺史幡。陸氏已隨塵世換，  
張公獨異聖朝恩。諸峰盡化旗幡立，流水皆成珮玉喧。  
洞裏胡麻天雨種，岩前叢桂月移根。緣崖時見銜花鹿，  
汲澗常隨飲子猿。青鳥晝傳王母信，蒼龍夜泣老蛟魂。  
飛雲甘臥山頭石，鳴霍難忘日下軒。從祀壽宮恆近侍，



受釐宣室或浚論尚方制服黃金重大府分圭白玉溫  
扈從多騎天廐馬會朝長次赤墀鵠渴沾瑞露來中禁  
饑食蟠桃出內園垣誓使民風齊渾沌仍祈主壽過軒轅  
歸來爛醉東西塢更爲文安理故園

一詩押兩園字誤

晚泊貴溪遊象山招真觀

柳貫

舟行弋陽道山石多異狀嵌空露鍾竅屹立儼圭鬯沿  
洄數百里瓌鐵森相向最奇象岩下仙觀占丹嶂舍棹  
遵微行松篁插雲上開門看青壁左右挾高閑飛雨洒  
面來輕颺入檐颺道人出迎客牖戶坐南嚮延登昇仙  
臺境肅神滋王不知日車側但覺天宇曠我生名山遊



正費屐幾兩采真喜初遇戀勝期屢訪布帆催夕舉未  
敢恨飄蕩水深彭蠡湖兩眸更東望

送道士何大方歸龍虎山

玉露金風桂館遊江南還問木蘭舟路逢道士呼元放  
市有仙人號伯休仙珮淩風聲窸窣神丹開室氣浮浮  
成書想見青囊底乞我元霜點白頭

喜盧碧自龍虎歸

宋 无

雨巾風帽別真師雲滿天壇駕霍遲囊佩山圖行幾日  
綦逢仙客看多時丹房芝朮春英長玉洞烟霞夜夢離  
定有壺公遠相送瓢中添着幾篇詩



爲蕭元泰題龍虎山仙岩圖

陳旅

龍虎之山仙所寰我昔夢寐遊其間乾坤風氣結冲秀  
中有正一元都壇羽人授我九節杖林磴窈窕窮幽攀  
金宮藥殿起寥廓翠崖丹巘陳廻環峰頭時飄白菡萏  
石上盡種青琅玕諸岩一覽二十四總似瀛渚蓬萊山  
清溪浮空引雪練遠岫隔水來烟鬟就中仙岩更奇絕  
上有玉樹皆檀藥虹光夜半出林杪云是石室韜神丹  
欲求刀圭已衰疾羽人去我如飛翰褰裳磴曲采芳草  
斷猿疎雨春山寒覺來俗事日滿眼歲月冉冉隨驚湍  
會稽蕭氏忽相訪笑以此圖令我看夢中羽人貌真似



而我別後須毛斑題詩聊復記疇昔願拂塵眼齊驂鸞

南山詩

并序

山在龍虎山南張宗師藏劍鳥之地曰丹邱  
有小有洞門玉津澗月橋天鑑池金砂井躍  
泉漱雲亭山雲閣丹桂塢桃花源云

江左群山囿仙邱倚太霞上清分亢爽南谷抱谿舂臺  
觀黃瓊宅林嵐赤虎家天池開寶鑑日井射金沙桂實  
秋岩栗桃烘曉岸葩泉香通美竹雲液漱靈芽俯澗松  
偏潤緣崖逕自斜幽亭宜水繞晴閣受嵐遮神鳥丹扃  
祕元關紫氣賒石橋畱月色銀浦渺皇華願解延陵劍



終乘博望槎臨風一邂逅食我棗如瓜

先天觀

龍虎山南古澗阿幽人住處白雲多千林總種三珠樹  
百畝曾收五色禾丹鼎夜光迎海日石船秋影接天河  
寰中異趣知誰會我欲窮源過碧蘿

送張真人代祠武當龍虎兩山追賦

桂館祠官持羽節名山兩地躡丹梯共誇曼倩來金馬  
大勝王褒祀碧雞杵澗暝痕消雨石杼岩秋影動星溪  
蕙肴椒醕登瑤席定有神光起時畦

賦得琵琶峰送人降香龍虎山 余闕



瓊峯毓竒態高高出先天柄超琳闕迴盤影淶池圓別  
廊標蒼樾回窗蓄紫烟淙流如度曲藤蔓似長絃肖像  
生儀始希顏大古前雖無羅袖拂常映澗花妍子有靈  
侯技能彈大道篇函香一臨眺天際意飄然

壺洲爲上清張道士題

張翥

錦水西頭觀闕青仙家原不隔滄溟鳳麟洲渚寒凝碧  
雲霧衣裳夜降靈金醴浸花畱客醉玉笙吹月使龍聽  
看君福地容蕭爽長與曾孫宴幔亭

送上清道士李自賓歸山

歸去青溪點易窗仙林如子世難雙丹藏虎豹千山雪



劍渡魚龍萬里江別洞苔花分石路古壇松子落岩淙  
道人不用尋烟火水煎經冬正滿缸

龍虎山四詠

貢師泰

金雞山

巨靈擘山石飛出黃金雞至今山下人猶聽雲中啼

象山

載寶出西域獻琛自南溟仙人一叱之化作青巉巒

龍井

寶劍落深潭時時見光怪鱗甲飛上天白晝風雨快

雲臺山



天星二十八下作漢廷將功成歸帝傍精彩射石上

廣微天師祈雪有應詩以美之

九枝燈照碧壇空  
龍虎旗高滿  
殿風綠簡夜深朝  
玉陛素幢春淺拂珠宮  
一天凍色星河合  
萬里冰花陸海同  
明日內家應錫宴  
綵符爭取綴釵虫

送道士張宗岳奉賀正旦表朝京竣事還龍虎

山

葛邏祿廼賢

大明初啓日蒼涼  
天子垂衣御萬方  
花織錦茵雙鳳翥  
雲浮玉座九龍翔  
珠懸殿幄晨光動  
燈轉紗籠刻漏長

大明殿幄懸大寶珠于上  
中設郭太史所製燈漏

銀漢星槎來萬里  
綠章雲篆



賀三陽鳥趨青瑣烟霏繞酒出黃封雨露香芝草繡衣  
金纂纂芙蓉紉珮玉瑤瑤重瞳屢顧真希幸寵渥頻承  
特異常辭陞更瞻天日表賜環應在水雲鄉畱侯印綬  
將歸壁使者旌旄已起裝河朔遊塵隨騎氣江南清夢  
入詩囊仙源路近桃花發鬼谷山深槲葉芳後夜相思  
京洛士黃精還許寄來嘗

元圃爲上清周道士賦

元圃雲深路渺茫神仙飛珮隔扶桑碧桃開盡春溪漲  
白雀歸來海月涼岩溜涓涓鳴石竇松花細細落琴牀  
明年我亦山中去賸采瑤芝滿藥囊



題薛元卿瓊林臺

杜本

上清仙靈都凡山無與儔况茲瓊林臺雲氣接神州嶽  
坼扶地軸鬼神動天球珠樹粲瑤城玉衡懸清秋層冰  
積高寒梯構靡其由外史洞元化於焉采真游珊珊紫  
霞珮皎皎明月鈎手攜千歲藤足弄萬里流仰觀元圃  
運俯視八極周緬彼大瀛海變滅多浮鷗悠然發舒嘯  
永矣此夷猶

題龍虎孫希聞尊師爲蕭泰定所作丹房寓隱  
圖

錢惟善

結茅雲裡萬塵空辟穀相期伴赤松晝夜長明羽人國



春秋不老藥仙宮飛騰舐藥還雞犬蟠伏成形看虎龍  
縮地壺天今有術願辭羈絆問參同

題廣微天師昇龍圖

噓氣乘雲薄太清墨鄉靈怪硯池腥波濤光彩失雙劍  
風雨晦明驅六丁朱火騰空超碧落翠鱗垂水捲滄溟  
真人上挾飛仙去安得攀髯過洞庭

送危尊師奉旨還龍虎山

傅若金

蓬萊使人朝帝闕御風上下何超忽青節春辭鳳閣還  
紫簫夜送天香發山上蟠桃應著花五雲何處是仙家  
但祈下界多年穀長共群仙飯熟麻



天師張太元祈雪歌

至元二年冬不雪天子夙夜憂黎民宮庭擇日詔方士  
臺觀通天求百神雷侯之孫住龍虎世領祠官列圭組  
鳧舄經時謁紫微鳳章半夜飛元武皇天愛民祈可必  
臘雪依微應三日望拜還聞在竹宮受釐忽報臨宣室  
天地杳默韜元功賜予紛紜恩禮隆請和六氣輔元化  
常使九州歌歲豐

壁魯洞二首

盧摯

南山採藥北山樵把斷閭風天不知試問龕中二三子  
爛柯人是向來誰



萬古仙岩兩羽衣一瓢秋水送將歸欲知後夜相思夢  
月滿空山雀共飛

虞先生送張元樸回龍虎有云麈尾每懷張外  
史鵲群今屬薛元卿元樸索次韻張 兩

想見先生戴笠行黃茅岡上看陰晴承聞祖道同疏傳  
鄙說還鄉似長卿海內好詩原自少江西行李不嫌輕  
謫仙愛與元丹語烟子而今亦有名

素華堂

素華臺榭壓崑邱况近仙家十二樓白裡深蟠龍虎氣  
空中遙接鳳凰遊瑤璃硯水偏盛月雲母屏風不隔秋



姑射山中有冰雪神人願與國同休

崇禧觀

吳全節

曲林古觀水西流天遣皇華駟玉虬高士遠分龍虎派  
哲人久伴鳳凰遊樓臺山色三峰曉池館泉聲五月秋  
雲案凝香浮洞府坐令和氣藹丹邱

繁禧觀

門前流水泛桃花回首蓬山別一家曾把金莖食沆瀣  
閑揮玉麈看琵琶火存丹鼎春長好卷掩黃庭日欲斜  
心與江湖天共遠大開瀛海駐吾槎

送朱本初之玉隆宮

薛元曦



西山紫翠簇芙蓉師住逍遙第一峰  
慎勿挽弓思射鹿祇須鑄鐵學降龍  
閒穿晚月餌靈藥醉拂秋風臥古松  
應憶京華舊遊處蓬萊坊畔五雲重

演法觀

蔡南老

馬蹄蹋殘雪細路穿榛叢雲埋山骨冷  
日落村市紅松間有樓觀興剏基址隆  
年深屋已老破壁號悲風堂堂顛道士  
電光閃雙瞳胡爲赫斯怒哆口如虬龍  
傳是漢天師家託一畝宮當年信英偉  
霹靂在手中劍涵秋水澀鬼穴蒼苔封  
雲車已遼邈第宅猶穹崇我來壯其說  
舉酒豁心胷嫉邪師所尚憤世我亦同  
今人不甚正徒



使百邪攻天關呼不聞此輩尚苟容英靈倘可致速爲  
除奸兇

十華觀

伯顏子中

十載風塵忽白頭春來猶自強追遊香浮素壁雲房靜  
日落青林石徑幽海內何人扶社稷天涯有客臥林邱  
此心祇似長江水終古悠悠向北流

上清道士方方壺爲表叔冲虛天師作五圖皆  
龍虎名勝庚戌過自山中冲虛公命賦詩

南山秋色

胡布

太古有蒼玉翬飛凌素秋一從開混沌元氣相和流乾



象曜元景坤儀迹方周至哉歸有道尺素竭冥搜

鳴玉垂綸

至人撫元運神功冥化機豈於得魚矣遂以忘筌爲天  
濶山空處水流雲定時際茲心手契物我了無疑

高風振衣

萬壑洒朝暝連山漲雄圖元風鼓大漠天籟緣空虛引  
我碧瑤琤因之紫霞裾飄然極八表游心觀太初

臨坡高興

坡仙滑稽流壺子江海氣爰以一寸毫邈此百年意攜  
鱸寄雅興夢霍亦竒思慷慨展新圖高情見形似



湘水斗壇

瀟湘好雲水流月艷叢篁掃石仰碧落乾文星斗章一  
彈龍唇琴再拂虎盤囊霍暖冷風至飛步躡三光

次韻許維翰見示龍虎山吟

三十年來憩龍虎天關地軸相騫踞就中真靈呵護神  
仙居元圃閬風無間住陽平治隸青城山飛度此地還  
成丹溫溫鑪鼎崛起仙岩畔綿綿嗣系鬱羅班千有餘  
年猶龍宏教起累朝錫號侈爵四海崇高美至道忘忘  
湛一真至人無我爲元始輔元翊神裨化工竅補混沌  
天玲瓏竒山射的峯巒似怪石鳳麟洲渚同鬼工絕巖



呈巧構龍井古壑開幽宮以誠投之致應格有物徃復  
施報無終窮塵湖琵琶接突兀雲林白馬拱衛當成功  
天上地下三十六一轆轤中幻海屋太和元化體同仁  
祖氣從親自敦睦吾甥眉宇真天人帝錫玉笈金宮籙  
金宮籙集百祥臻五福公侯名爵位神仙不與憂患承  
天祿

明

雲寓軒詩

并序

宋濂

龍虎山鍊師張君仲毓嗜學而攻詩尤善鼓  
琴嘗汗漫遊於湖江自謂若白雲出入空谷



杳無定蹤遂以雲寓名其軒命弟子上官若  
冲來請余言夫膚寸而起倏然羃乎太虛者  
雲也英英份份資一氣之流行固凝而聚矣  
已而飄忽乎東西歛跡藏形類若不知所之  
此無他雲無心也方外有道之士茹芝餐霞  
捐去塵俗之累翩翩然御風而遊元化間來  
無所繫去無所繫絕如雲之寓乎太空此無  
他亦無心也仲毓取寓雲以名軒不亦宜乎  
予聞至人不物夫物然後能齊於物仲毓自  
比於雲善矣而未免物於雲也物於雲則有



凝有礙則不虛不虛則靈明不通矣我不爲  
靜而動何形焉我不爲動而靜何容焉是則  
動靜一如也我不爲雲則夫卷也孰從而舒  
之舒也孰從而卷之是則卷舒亦一如也仲  
毓試澄心默坐存神於鬱羅蕭臺間冲漠無  
朕而萬象森列其中而吾神未嘗形也未嘗  
形而雲果就寓乎予當約仲毓遊金庭委羽  
之墟勺松華泉擘麟脯而食之且請仲毓出  
琴彈白雲之詩琴調清越羣仙或有驂鸞來  
聽者矣寓雲與否非所敢知其詩曰



雲溶溶兮無根倏聚忽散兮不知其門變化罔測兮契  
乎道真龍虎名區兮列仙之倫翦雲製衣兮結雲以爲  
紳超然高潔兮日與雲而相隣步虛九天上兮不沾世  
氛水火交媾兮日月吐吞雲兮雲兮寓爾以終其身

贈龍虎山鄧子方鍊師

貝瓊

鬼谷仙人弱水東身騎一霍御青童坎離龍虎蟠金鼎  
日夜神明守絳宮筆掃琅玕三竺雨琴彈霹靂滿林風  
白頭欲問長生訣笑我京華尚轉蓬

遊仙岩二首

吳伯宗

獨喜尋幽境閒逢採藥翁丹邱知不遠只在碧溪東



石髓雲中現蓮花水上浮神仙如可得直到至高頭

過龍虎山

甘瑾

素書一束展經綸世業畱侯異等倫紫府群仙天上籍  
碧桃流水洞中春吹簫羸女臺畱鳳送酒麻姑脯擘麟  
看取步虛朝帝所夜闌飛佩近星辰

遊龍虎山

流水灣迴路百盤化人樓閣倚清寒枕中鴻寶長生籙  
屋外元都太古壇金鼎有丹先試犬玉簫無曲不吹鸞  
麻姑未老秋霜鬢幾見扶桑海水乾

送周鍊師還龍虎山

潘子安



年來忽憶舊岩扉  
即向青天跨鶴歸  
老樹著風驚虎睡  
好山和雨作龍飛  
松間夜月封丹竈  
花底秋雲補練衣  
辟穀有方仙有術  
笑人空餓北山薇

冬日還峴泉

張宇初

郊墟物候和野逕  
抱溪曲言旋白雲  
岑烟樹澹餘綠淺  
瀨引寒流崇巒披  
秀木荒疇已蕨蕸  
隱構藏林屋深窟  
想兔脫危機絕羝  
觸母爲弓旌招靜  
言抱松菊

乙亥季夏還山居偶興

末夏熾餘暑幽期  
諧素衿川原蔽繁  
綠溪渚澄深潯田  
舍靜雞犬荒蹊抱  
深林圓淵敞靈構  
疊嶂羅高岑荷氣



薄朝露魚波依重陰披襟遂恬息濯澗清閑心遺世非  
塵傲養真宜自任秋風動早思寫我邱中琴

次楊孟頊遊仙岩韻

靈嶽冠方蓬秋清氣蕭爽駕言物外遊放棹浩幽賞溪  
渚抱縈紆灘瀨逶迤上河伯水成宮天機錦爲障仙壇  
雄漢基虎嘯發空響瞻謁步瑤宮丹崖列竒狀賀醞釀  
盈瓢孟机絲在紡探尋興疑謝曠逸情過向大貝聳飛  
樓精金赫穹像夕酌盡歡倫群才各尋丈曉發潯潭濱  
微瀾揚浩盪靈蹤肆險怪憂患孰疴癢姜被感情深陳  
膠羨才暢王恭貌愈純吳猛志須廣詞銳善袁宏談優



懷郭象島嶼僻花源汀墟蔚相望問津羸俗非幻語曷  
浮誑斥鷃等塵趨文犧慙世想坤維渺溟渤天籟靡霄  
壤適意豈猿攀忘機信鷗往預諧斟菊英臨眺孰輸曩  
泛覽記漚輕遐情矚虛曠榮衰倏古今雅度試豪放自  
非金石姿應昧元珠罔舉首俟佳期高風莫能忘

癸未秋同叅議胡公遊仙岩

天壤有至樂朋情胥會難君侯託素契雅度矜崇班蔚  
蔚英妙際循循儀度間南宮始佐蒞藩閫茲維安至治  
在匡輔冲襟彌靜寬貽緘首辱眷往顧徐趨歡別緒喜  
傾蓋切磨窮大觀明發鼓漁棹仙都肆遊盤艇移舍塵



闌柁遠追名寰曲渚抱孤嶼寒流歆淺灘顛崖避犂确  
絕嶂披巒岼懸蘿翳渭釣折逕逢陵竿竇隙鷹鵠舉滄  
溟龍蜃蟠靄淨雜猱嘯風淒驚豹謹永絲韻白雪露穎  
標金蘭謝屐步沙軟郭蓬維岸間雄吞浩塹劫眇視界  
倪端野蕝侑芹酌山謳來浦湍夕照明綺縠冷飈響琅  
玕仰懷軒冕徒何幸同躋攀聖德被隆渥耕樵忘險艱  
適意嗜真率榮名付幽潺曠懷孰阮向高繪徒荆關秦  
使妄瀛閭漢槎仍渺漫暝色入襟袂揚篙迴溯瀾燒燈  
宿琳宇荊燎鳴鐘殘熾火滌清冷傾樽少怡顏仙猷戴  
祖澤凋謝慚空山玉氣墮空籟珠英浴神丹靈璫若宛



降錡珮停飛鸞遐迹仰期偃垢氛出冥翻炎威陋僊佐  
超思哀置猿三益慰箴迪冰霜同肺肝蕃榻接清夜陶  
輿馳薄餐願符稷契資盛代逾歐韓繼緒情曷已矯首  
遲東還

元夕後喜晴登靖通庵

春陽藹微和扶疾釋餘怠真館肅虛寥幽尋倏逾載小  
逕迷積葉雲蘿遞空籟飄梅散輕腮竹柏紛映帶澹寂  
每清神晴光列窗黛燈宵雜市喧鵲佇凌空界撫心倍  
仰止素託挹深賴叢陰支倦還由茲悟元解

橐籥子歌



太虛無垠浩磅礴孰使陰陽兆開鑿皇皇真宰執化樞  
鼓蕩吹噓橐中籥由來萬有同一源玉檢瓊編祕經略  
元元聖祖啓妙機百萬微言示冲漠廓然茫昧天地先  
無名無象皆自然百鍊精金返真液龍馬烏兔相縈纏  
古來至士亦罕遇至人真祕億劫傳祝融之孫得異說  
垢足麻衣叩雷穴自言縱閉司雨暘霹靂鞭驅隨奮烈  
少曾飛步金馬門聖嗣勲卿盡傾結翻然不受簪珮羈  
直駕風霆走吳越是時金壁羅英豪豈意風塵頓愁絕  
韶華滿眼總灰燼傲睨芳罇肆談閱歸來且識真主顏  
仙岩鬼谷思盤桓掃花酌水弄清嘯塵世俗慮無毫干



洞觀向來去就不足數登我石磴之上洗耳聽潺湲昨  
言忽憶桑梓里天冠之壇久蕪弛雕甍画棟勞經營越  
歲前畱復雄峙削空兩壁裁帝宮石室雲牀蓄風雨我  
亦尋山築茅屋琵琶諸峯美如玉嘗聞大藥宜早營鍊  
就丹光遍空燭洞庭彭蠡波滄溟黃雀一去安飛行永  
鉛顛倒豈細事爲我剖決乾坤精誰云洞天別有書洞  
中之天惟虛無既非皇人所筆廣丈餘又非元始所說  
空懸珠煩君鼓橐訊然否請括溟滓大塊歸元初

宿馬祖岩

鑿石開蘭若栖禪結上方然燈聞佛磬聽雨宿僧房古



樹岩雲合幽花澗瀨長素耽坡谷輩了悟幻中忙

遊壁魯洞天

并序

吾山壁魯洞乃漢天師得神虎靈文之所也  
崖壁雄怪最名於時歲甲戌季秋望日余同  
弟彥璣西塾龔君紹庵吳君志德遊焉覽勝  
窮日信乎仙真之府也不能無一言以紀之  
遂賦長律三十韻併柬諸同遊者探竒索異  
之餘必能唱和於空青林籟間也

壁魯天真府佳辰足勝遊雅期先九日遐賞屬三秋  
桂聯仙萼名簪協令儔溪潯沿放棹林渚漸經邱村迓



延時酌山庖款暝畱峻崖懸積鐵密樹響鳴球霧引湘  
簾細星垂藻井幽泉分霜楮白礪抱露苗稠席月麋隣  
豹厨烟犬雜猴曉炊催束袂野款盡交籌樹日氷華淨  
眠雲練綵周履危拋謝屐步側舍陶舟洞戶駢肩入岩  
扃並涉求攀援聞窸窣指顧坐綢繆陰壑盤風磴陽岡  
洗畫雰淒飈宜落帽凝靄欲加裘漢迹神藏虎秦封木  
臥虬魯侯嚴甲衛太乙祕冥搜寶笈虛靈檄琳書著羽  
流貫魚窮險怪序雁少夷猶秀採蘓耽橘涼斟玉女湫  
古槎懷博望深谷候巢由枝穩驚棲鶻身輕愧浪鷗畏  
途惟仰睇空語遞喧訕先轍追芳躅眞盟仰大猷鸞行



經別竇磬折俯傍鈎嗣忝神明胄才違簡帙修帝廷嘉  
靜謐元圃遂優游歸策還停霍全生悟解牛幻名題絕  
壁曠劫視崇休

五月望日陪仲縉先生遊仙岩分題雲錦石賦三  
十五韻

靈蹟仙真會欣陪覽勝同斯文推世重盛代仰儒宗才  
挹華川秀遊將弱水通放舟移市酒啜茗下漁篷石瀨  
翻晴雪溪橋蕩晚風鷺輕洲渚僻霍靜島屏空洞戶容  
舳窄川涯貯棹窮蒼崖分禹跡碧樹閤秦封錦織天機  
妙藍浮地軸雄虛冥隨架鑿造化孰陶工庾廩縱橫立



簷櫺隱約逢鳥巢驚決皆猿竇晦冲融河伯藏幽府馮  
夷隱秘宮高風寧郭泰雅度獨王恭酌螳詩籌遍題岩  
筆興供漢祠松檜古明珮水雲豐晚翠延鐘入殘紅掃  
席充丹光遙爍電劍氣遠騰虹虎豹疑陰藪蛟龍信大  
淵琪篁深夏竹瑶草細春茸聯壁烟霞表懸珠月露中  
山醪慙醴釀潭鱸想雲夢下榻苔侵履凭樓澗瀉桐乾  
坤旋塊圯歲月浩洪濛梵放交林籟幽期託桂叢謝程  
耽險怪莊語振盲聾樽俎歡承洽箴規惕在躬詞源傾  
渤澥道統企衡嵩王德嘉賢孝臣衿體令忠青城猶祖  
澤壁魯固神功星漢澄空寂塵氛滌浩冲九要蒙琢礪



三益感磨礱惜別情逾切論文義最隆令名追賈馬清  
聞記方蓬耀古琳球彩千秋紀製穹

題龍虎山圖

道區今昔著江東虎踞龍翔萬壑雄紫翠峰巒三島外  
金銀臺閣五雲中天低絳節來黃石地亞瓊旌候赤松  
橫槊停驂肆登覽展圖何俟覓方蓬

元都道域重仙山翠水丹崖四望環萬竅摩空喧地籟  
九霄飛佩謁天關丹光夜燭驅龍耀劍氣晴追羽霍還  
喜授靈詮探禹穴王廷好爲說幽潺

遊水簾洞



幽洞雙關入杳冥  
瑶林瓊嶽後先行  
層崖珠落簾收瀑  
疊嶂屏開錦列楹  
擊石尚須期嘯父  
捫蘿端欲候仇生  
澗阿藉地林霏暝  
寫盡絲桐世外清

冲元觀

張宇材

叅雲樓閣半天中  
六月清風百尺松  
隱約齋壇低曉月  
五雲深處一聲鐘

東方方壺

張嘉定

芙蓉千仞晚岩堯  
風卷層雲次第消  
雪樹近天微點染  
雲衣拂石故飄飄  
玉山寒氣高相並  
紫閣孤標迥不招  
欲得壺山飛彩筆  
憑誰蛟室取水綃



龍虎石

王崇慶

小澗碧桃春自開  
上清宮殿鬱崔嵬  
仙風霍馭今何在  
閒聽洞簫深夜來

送謝鐵崖遊龍虎山

凌雲翰

有美人兮懷遠遊  
逍遙九州復九州  
暫來淮楚與吳越  
五雲飛上千金裘  
八公山在淝水上  
草木尚若森戈矛  
澄江如練誰解道  
况聞好鳥喧春洲  
東山薔薇幾回落  
昔人何處青苔稠  
錢塘故宮盡禾黍  
帝子一去江空流  
客兒亭前高興發  
便欲著屐窮深幽  
天雞三鳴更五點  
海日涌出黃金虬  
瑤笙聲斷白霍遠  
知有子晉從浮邱



蟠桃開花今已實似許方朔重來偷如何去作龍虎客  
遠慕漢代張留侯我聞仙翁號虛靖草庵宛在山之陬  
長乘丹光翳彩鳳或有紫氣垂青牛子能候之問至道  
黃庭內景非難求四方上下遊已徧歸來十二仙人樓  
樓中長嘯弄明月握手一笑三千秋

張太元天師畫降龍圖

王淮

老龍不識天有數剛要爲霖觸天怒天呼六丁驅下來  
不容駐脚天衢路雷神伐鼓雲揚旗火鞭亂打列缺馳  
海波起立一千丈陽侯叫噪馮夷嘻泥鳅土蟾妖鬼技  
側睨坳窪務得志那知龍抱九土憂弭角摧鱗潛出涕



青房山志 卷一 三詩  
哀哉九土毛骨焦蝦蟆蜥蜴擔工勞爾龍穩穩臥海窟  
再莫多事生波濤海中雖無五花樹海中綽有閑田地  
朝吐扶桑白日光暮吞細柳蘋霞氣我聞北周之北是  
大荒一團陰氣餘無陽何不啣取玉燭上天去晒破鼈  
足八極俱輝光

靖通庵

韓陽

見說仙翁結草亭亭前七十二峯青欲知水秀山逾秀  
當識人靈地亦靈暫駐星輶遊紫府因逢羽客寫黃庭  
夜深霍唳松梢月酒醒丹房枕畔聽

和前人謁仙岩韻

廖簡



蒙茸披盡到重岩  
栖鶻危巢屬仰攀  
萬劫江山紅樹外  
數聲鷄犬白雲間  
玉爐烟裊凌空翠  
石鼎茶香試虎斑  
爲語道人休說法  
古今何處是無還

遊仙岩二首

韓 雍

扁舟遊覽故人同  
勝景分明在眼中  
陰洞兩崖無路到  
晴岩一竅與天通  
雷傳賸得神仙迹  
開闢宜思造化功  
我有仙鄉歸未得  
不堪回首白雲東

九載名山五度過  
山容鬱鬱勢嵯峨  
洞穿碧海飛仙島  
水接中天織女河  
白雀翻風秋氣爽  
紫簫吹月夜涼多  
宦情也動幽栖念  
爭奈深恩未報何



遊上清宮靖通庵次壁間韻

顧應祥

蒼苔白石野亭閒  
虛靖當年住此山  
一自雲輶歸海上  
獨畱丹室在人間  
谷中夜有元猿嘯  
松頂時驚黃雀還  
欲向真師傳口訣  
可能駐却鏡中顏

雨過仙岩

黃應元

何年鍊藥啓岩扉  
碧井紅泉尚有輝  
水接銀河移客舫  
天迴珠斗近人衣  
波光滯雨看徐盡  
谷響因風聽轉微  
安得憑欄開霽色  
一招笙霍駕將歸

香爐岩

春烟漠漠雨冥冥  
鑠斷香爐萬仞青  
此日維舟看不足



何時攜杖扣岩扃

昇真岩

峭壁盤空隱翠微  
仙源自與世人違  
紫芝白石春長在  
虛擬吹簫跨鶴歸

酒甕岩

何年仙甕擲崦嵫  
香霧霏微望水涯  
青鳥不來雲路杳  
空教醉殺碧桃花

蓮花岩

面面芙蓉類削成  
春風環珮入瑤京  
無須太華峰頭去  
此地堪期玉女盟



仙確岩

奇岩天削鬱嵯峨雲確蕭蕭臥女蘿自古仙源多感慨  
胡麻流水復如何

藥竈岩

白雪黃芽不可尋空餘遺跡碧崖陰山花滿目紅於火  
猶擬燒丹欲變金

仙床岩

誰云塵世無蓬島石榻雲霞護幾秋我到欲眠啼鳥亂  
却虛春夢五城遊

仙犬岩



萬樹桃花萬樹春  
洞門層掩學仙人  
移家何日來居此  
鷄犬圖書作比隣

仙蛻岩

仙人真隱紫芙蓉  
窈窕凝眸定幾重  
吹徹洞簫何處去  
千秋遺蛻白雲封

仙倉岩

岩下江流瀉玉長  
岩頭瑤草擅春光  
仙家盡道休糧得  
雲叡如何亦有倉

仙磨岩

疊嶂岩堯不可攀  
烟嵐飛濕滴人寰  
年年春暖香風動



磨外雷雲萬古間

老祖岩

琳宇瑤扉紫翠間  
花源蘭棹倚澄灣  
仙翁料得多慈憫  
願乞飛砂一駐顏

龍池岩

靈湫一派浴層霄  
龍氣千年望未消  
幾向中天作霖雨  
還從大海漲波濤

獅子岩

天畔雲根隱薜蘿  
誰名獅子鎮岩阿  
風號電掣長疑吼  
虎豹風雲肯浪過



木屐岩

高叡凌霄錦繡叢何年蠟屐駐奇蹤  
麟洲鬱水程多少盡在鏗然折齒中

天倉岩

峭叡蒼蒼上倚天仙人遺廩視如拳  
山中芝菌殊堪食始信崑邱有玉田

仙棊岩

瑤草岩前春自生芙蓉澗底淺還清  
仙人駕雀去何處空對寒雲鎖石枰

仙桃岩



仙桃誰擲此中來不似東溟度索栽  
變作雲根成不朽  
漢廷詞客莫輕猜

仙人舊館

飛梯百尺挂岩頭下嵌潺潺碧玉流  
倚檻恍疑排羽翼  
應知此地即丹邱

仙岩

邵寶

西岩壁立青雲齊岩頭飛翠滴半溪  
仙家百物有尺度  
括什只少犬與雞東岩亂石叢水際蓮花委  
瓣瓜謝蒂  
其中高者承烟霏肩接西岩似兄弟  
溪水中流何處來  
此爲門戶闔更開神靈萬古諒斯聚氣吞風雨聲轟雷



海流清淺近蓬島山勢縹緲藏瑤臺避秦之人不到此  
劉阮亦浪誇天台昔聞江子復羅子險語堪收方外史  
此行參訂不我誣謾向山人究終始山人不知知者誰  
世有何事非天爲空濛却增眼底勝磊落真發山中竒  
且將白酒酹岩下秋風爲我開貞姿

仙岩洞和韻

熊相

景入仙岩洞昏鴉壓樹低路從丹井畔僧向水雲西草  
滿無人跡林深有獸蹄孤峯登石筍物物可詩題

次李空同遊象山書院

夏言

泛舟涉前津陟岸歷平坂岩高既岑巒境曠復幽衍遺



祠莽荒寂俎豆舊莫展鄙予辱里門歎惋屢縈緬壯哉  
李子遊清風披層巘千秋宥堂構吾道賴舒卷歸來重  
修謁初覲昔心遣遺音託深劄三賢諒俱顯

登三峯山有懷象麓草堂寄題 詹瀚

我登三峯山遙望薌溪曲薌溪春樹入雲烟草堂宛在  
南山邊堂中主人桂洲子諫垣英譽天涯傳日草太元  
三萬字夜深獨對滄江眠滄江深深通象麓夢回春草  
池塘綠鍾山已改謝公墩此地何宜歸二陸桂洲子象  
山翁百年氣味真相同扁舟未鼓薌溪棹西瞻象麓空  
龍蔥



龍虎山

羅洪先

心閑無所適高閣日凭欄  
虛谷多朝氣深林生暮寒  
猶龍嗟見聖煉虎欲成丹  
二事吾何有逢人且共餐

遊龍虎山遇裴仙用登九華觀韻夏尚朴

洞府春常在仙都路不遙  
六龍飛白日雙鳥下青霄  
瑞氣騰雲閣靈芝長玉橋  
茲遊真不偶宿契似相邀

陪夏桂洲舟遊

張彥頤

景屬真仙境波浮上相槎  
元調餘赤手顏駐問丹砂  
笑語情何洽煙霞興自賒  
磨崖揮彩筆岩壑倍光華

登龍虎山望水簾洞

李萬寶



翠壁何年畱霧檢青春邀我禮星壇鳥啼猿嘯空山靜  
古木蒼藤白晝寒陟巘自携斑竹杖臨池誰浴紫金丹  
塵襟滌盡真忘返洒洒飛簾最耐看

謁漢輔漢真人祠

羅治

截業峰巒草樹青尋仙深入晝冥冥風雲高闕通群帝  
雷雨空壇集萬靈天際青牛虛望氣松間白雀自聽經  
長生欲問無消息只見空山長木苓

上清宮

萬壑千峯擁上清丹邱自記昔時名居然宮闕同三島  
若有仙人住五城天上時時聞駕雀雲中徃徃見吹笙



乞靈漫有塵埃念錫與真符是辟兵

遊仙岩

邱雲齊

深山十里松杉冷窟傍鼃鼃別有家白雀避人巢削壁  
黃冠邀客飯胡麻岩頭仙蛻凌春雨洞口丹爐結晚霞  
莫道門前非弱水中洲歲歲碧桃花

遊仙岩雨行

王宗沐

朝行急雨苦相隨頗訝山靈自祕奇忽漫峰頭開霽色  
翻憐雨後倍幽姿野烟漠漠迷歸鳥江葉微微點漲漪  
武陵有路桃花水鼓棹窮源莫自疑

遊上清宮

袁煒



徐步仙宮裏松筠拂檻齊  
潛龍眠古洞瑞霍立高枝  
藥竈香風起丹臺紫霧迷  
道人無俗慮樽酒對枰碁

桂洲

顧璘

夏子情悠悠遮我叙桂洲  
桂洲亦有始請從先世起  
雙溪何滔滔中洲坦如砥  
群峰互環帶錯落奠屏几  
琵琶特竒峭西迴蹙高址  
其陰倚靈象儒先記仁里  
其陽抱龍虎仙真夙攸止  
慨昔聚廬居瓜瓞綿多紀  
茲洲聿知名爰且因夏氏  
家運值陵歇洪濤忽淪圯  
皇曾僅一綫伶仃迫他徙  
皇考役四方歸櫬獲所委  
纏綿桑梓區顛倒鳩鵲壘  
賈宅空廢井孔壁漫殘史  
淒涼首邱念蹉跎



歲華靡孤墳沒寒莽吊望增顙泚桂洲揚芳馨林叟被  
餘美倘能返柴荆永懷釣溪水

龍虎山仙岩寺

朱維京

兀崕峰頭萬界低似無鳥跡但猿啼下方惟見雲根亂  
中頂真看斗柄齊堯率天高千佛現髑髏光滿十洲迷  
神房丹鼎依然在更有莓苔護祕題

題通天岩

汪正

通天岩頭多白雲通天岩下江水清道人騎霍上天去  
秋風吹月山冥冥

上清宮飲張真人宅

翁溥



侵晨駕鸞霍握節朝上清雲鎖龍虎關羽客開仙局元  
圃積烟霞洞天多祕靈宮殿皆瓊珠瑤草砌面生下有  
真人宅上通天帝庭仙人故棲在白日聞飛昇忽有步  
虛人天路遙相迎云是子房後辟穀今千齡飲我和玉  
屑飯我傳青精室中何所有玉几黃庭經庭前橘柚垂  
隱隱聞碁聲佳遊憺忘歸翛然遺世情長揖謝時人吾  
將師廣成

仙岩

王炳璿

落日浮漁棹桃源路若通洞深常帶雨山合自生風古  
跡虛畱勝仙人去不逢登樓還命酌團月出遙空



送張心湛真人入覲還山  
王穉登

暫時騎雀下仙都  
雖在紅塵不受汙  
處處投丹施法水  
人人擁轍乞靈符  
青天魑魅行來伏  
白日雷霆立雪呼  
道在無爲非異術  
好將清靜鞏皇圖

贈張大真人二首

黃汝良

仙源直接沆寥天  
聞道飛昇自漢年  
真誥寧惟茅氏得  
道言應是枕中傳  
祇將寶籙護千劫  
何事浮生問九還  
玉局雲音如可遇  
願騎青竹養芝田

羽蓋雲車珮玉符  
靈通世世領元都  
身遊碧落三天界  
手探真形五嶽圖  
洞裡吹笙黃雀舞  
壇邊喫酒白龍趨



憑君欲借降魔劍如此塵魔伏得無

遊仙岩水岩仙巢雲閣四首

陸萬鍾

層岩砥柱江之隅面面青蓮疊作圖自是神仙畱洞府  
未應人世有蓬壺玉梭龍化虛機杼金井丹還轉轆轤

岩凡二十四如土木棺屐藥爐鹽倉之類無所不有轆轤機杼皆其一也陋說劉安舊雞犬

雲中影響似今無

混沌誰開一彈丸波光潏灩浴金盤虛懸水月三千界

中龕大士像罨画樓臺十二欄飛翠濺空晴亦雨烟蘿垂壁

畫長寒簫聲縹緲雲端下疑有仙人駕綵鸞

翩然木末架仙巢千尺平臨山水交無地可能容卓錫



有人旋亦為誅茅花飛石榻雲常掃鳥下松窗風自敲  
乘興探竒還載酒共携瓢笠挂藤梢

丹梯委宛出層臺翠壁俄經一竇開

竇為張可庵所開遊者蛇行而下竒

甚伏氣何人携劍至求仙有客挾笙來

同遊者王憲使張真人袖

將白石飢堪煮衲挂寒雲手自裁長嘯倚空身世渺疑  
從弱水跨蓬萊

### 遊仙岩

王問卿

素有探竒癖扁舟此日來危巒真壁立孤閣自雲開攀  
磴如猿上凭闌望霍回仙蹤果可覓直欲抵蓬萊

東陽歸舟過鷹潭望仙岩

梅應春



飄然江上季鷹舟望裡仙岩境自幽珠閣嵌空層漢偈  
丹崖背日四時秋何須渡海尋瑤島直把浮槎犯斗牛  
傳語岩頭猿雀去歸來擬伴赤松遊

信州水岩艤舟登蜚雲閣

馬猶龍

似是桃源道頻通漁父船蓮花披石秀雲錦照川妍

江中

有蓮花雲錦石

壁冷空遺蛻丹封不記年瓊田雀駕杳故物爲

誰傳

龍虎山

劉應秋

疊嶂重巒鎖碧烟玉宮虛閣柱青天上方甲第連雲宅  
家世傳書道德篇松檜鱗殘時怒鬣鯨鯢石圻有飛泉



赤松黃石何由問白雪清溪好放船

登仙岩

袁懋謙

見說仙都縹緲間到來雞犬隔塵寰樓疑結蜃空中現  
人似騰猿樹杪攀擬挾飛仙凌絕嶠誰分玉髓駐顏顏  
天邊偶作乘槎使真向銀河泛斗還

仙人石

揭重熙

仙人何處去空有仙人跡時一聞笙簫元雲來絕壁

仙岩

山爲窟穴水爲鄉枕簟無風暗自涼一點微茫漁棹火  
數聲寥落鳥巢霜遙天不辨銀河色遠澗惟聞玉液香



絕頂九層樓閣迴飄然身世宿中央

國朝

和碩莊親王

別五十四代嗣師真人

雙鳧西至道風香梅蘂含春入  
帝鄉君掖風雷供吐  
吸我於三一測陰陽南雲夜月歸舟急旅雁秋聲別思  
長可憶忘機重剪燭心空物我釋冰霜

山中奉懷碧城大真人

宣重光

昔年奉使過仙山曾遇真人謁  
帝還龍虎峰前飛霍  
駕風雷壇畔列神班桑田幾見成滄海金簡頻聞錫玉



關回首蓬瀛三萬里猶慙凡骨戀塵寰

送張真人還山

李天馥

偶際朝正岳牧期少年承籙已稱師  
神仙家世編年遠風雨勛庸報國奇  
且共花辰翻白苧何須宮使譜青詞  
鳳城小住歸偏遽愁見紅龍著襜時

奉選登龍虎山吟

夏遠應時造

嵯峨雲錦山積翠深藏屋奉詔得茲來振衣入空谷  
地勝離人寰林幽絕塵軸遠聞聲泠泠巖懸千丈瀑嵐  
氣與秋烟不辨亭臯木金壇勢凌霄石室香雲馥迴然  
淨埃氛乍到眩心目虛靖張隱君曠懷辭天祿於此得



長生所食芝與菊野雀依樹巢丹竈臨溪築置身在蓬瀛何處尋天竺仰止意方深巍巍龍虎肅

署事三教主受勅歸山進呈一律

頻年翊聖紫宸邊九棘殊恩雨露鮮丹詔一行飛海甸綵幢十里振山川家藏舊劍龍還蟄竈積傳薪虎自跼携得天香歸洞府相招鸞雀祝堯天

雍正癸丑仲春重過上清宮舟泊雲錦岩值三

山王仙丈見招

重到西溪路漁舟入翠微青山花裏出白鷺鏡中飛風過聞朝磬雲開見羽衣丹砂如鍊就共向上清歸



龍虎山早秋

施遠恩

上清花木記深幽老桂婆娑報早秋  
風逗蛩聲來別院月明桐葉下高樓  
雷壇樹碧當窗出丹井泉香繞石流  
谿谷寂寥龍虎伏巖前唯見露華浮

龍虎山即事

施遠恩

龍虎鬱崢嶸靈山萬古名登臨一憑眺  
身世即蓬瀛講法參師祕談經祝  
聖明幽懷殊未已花下坐吹笙

雷壇春望

施遠恩

千里春流入望來放懷遙躡翠微隈  
雲封神虎藏書洞花覆真人講法臺  
溪鳥忘機相對語山鵲解事亦爭開



今朝頗愜清遊興  
烟外鐘聲且莫催

重開萬聚塘

施遠恩

萬壑水爭聚  
方塘盡草蕪  
斷開新面目  
洗出舊規模  
碧影晴雲共  
清光夜月俱  
春來花柳發  
絕勝水西湖

壁魯洞

施遠恩

窈窕神仙境  
深藏竹樹間  
半空懸石窟  
四面繞雲山  
洞古遺書香  
風清破衲閒  
遲回不忍去  
日暮鳥飛還

癸丑夏日偕閔惠吉師兄泛水仙巖并步原韻

三首

施遠恩

山餘宿霧雨餘天  
高閣凌空望裏懸  
翠壁半歌留勝跡



洞門深鎖臥仙人遊方外原為鶴石浣波心已是蓮  
鷗鷺不知閒甲子飛飛猶戀去來船

彷彿蓬壺小洞天是誰攜向嶺頭懸山間縱有忘機士  
世上應無好事仙花雨落紅添碧漲萍星弄影雜金蓮  
此行如入營邱畫幾疊烟波一釣船

山樓歷歷倚雲天水氣空濛屋角懸鳥立瘦藤閒似我  
魚飛碧浪淡於仙傾殘箸下千杯酒醉倒峯頭十丈蓮  
頓覺薄遊清興暢詩聲嘹亮徹歸船

草亭新月并序

張資理

翰林留公奉勅修大上清宮別於新建斗母宮



之東偏作草亭三間為宴樂賓僚之所理以方外  
亦嘗與歌詠於其間焉視去今才十餘年同人半  
在而草亭已廢弛無存後更數十年誰復知有此  
亭者因思往嘗共作草亭新月等二十題理既從  
事老子法初不以斯務為急所製詩與亭俱亡湯  
不存稿茲值山志之修探囊一錢故在亟請載之  
篇末庶不泯草亭之名

皓魄微呈顧兔靈半規先喜到山亭樹添暝色初驚鵲  
書映纖暉不聚螢碧玉鈎簾寒欲墜清水照席酒還醒  
庾公幽意知非淺莫訝頻開醉眼青



附知非贈言

乾隆四年歲次己未冬十月十有二日爲垣五十  
初度自愧積非正多負疚何當

仁者贈我以言辱承

同里諸公徵詩百餘章箴勉交至敬勒五中并刻  
有知非贈言錄一卷不忘嘉貺今志內不及全載  
附刻二十四首以誌盛云

和碩履親王

祇以精誠格 九天道心元味靜中傳朝真午夜星橫  
漢禱雨靈湫蟄起淵高奉上清丹禁迎榮膺賜號紫泥



宣綿綿鶴算從茲始何事砂牀問葛仙

多羅慎郡王

名通玉籍屬仙家西望瑤池路不賒每向爐中飛白雪  
常從袖裏蟄青蛇金莖慣借三霄露銀漢遙通八月槎  
天上承恩誰不羨雙鳬繞遍御園花

多羅寧郡王

琪花齊向小春明介壽筵開近太清寵受龍章叅祕  
笈榮依黿禁證長生壺中日月千年駐掌上雲雷萬  
象呈試上樓頭朝北斗應聞仙籟韻琮琤

大廷尉汪

澐  
岵懷



簪笏通明侍玉除走龍鞭虎下蓬壺雲雷篆古魔氛息  
松竹窗虛道味腴真訣自知從紫府大還何用說丹爐  
仙家日月原無量笑指青牛是螭蛄

大司寇史貽直

鐵崖

蓬萊仙島隔紅塵琪樹瓊花朵朵新摘句華筵貽靜者  
佐將錦字祝真人元修悟徹苞符理講席風開閬苑春  
歲月崢嶸空百祿長生何必煉庚申

少司農托

時文岳

名證仙曹德久欽紅塵不貯靜修心丹砂古鼎龍常護  
明月瑤壇鶴一吟恩錫兩朝司藻笈惠流千里作甘



霖蓬萊舊侶筵前聚獻壽深杯玉液斟

大宗伯任蘭枝

香谷

金臺姓氏溯華陽得道年來碧眼方人出邈峯推地傑  
星聯奎壁定天光三千太上叅無欲五十軒轅探未央  
此日雲車逢衛叔琳腴石髓吸瓊漿

少冢宰程元章

冠文

鳳闕朝回崔羽翔應鐘協呂晉仙觴雲間夙抱雲霞淨  
日下渾忘日月長神領羣真尋地肺道叅皇極拜天章  
可知九轉丹還少大衍功成節兆陽

大司寇張照

涇南



修修修得到乾乾、九九中延九萬年、日月暗扶君甲子  
教君見世作神仙

只種心田養此身、無爲無事信天真、河清海宴乾坤淨  
贏得蓬壺永劫春

集純陽仙句

少宗伯吳家騏晉綺

金闕峩峩紫禁中、瑤笙常繞玉清宮、不矜姹女丹爐碧  
爲禮星官蠟炬紅、祕殿從容承密旨、齋壇感格有神功  
小春暖近蓬瀛路、欲問仙桃放幾叢

少宗伯張廷璐寶臣

餐霞早歲躡仙蹤、咫尺清都問九峯、真誥已參青玉笈



湛恩重被紫綸封壺中日月開丹鼎物外交遊偶赤松  
自昔金門棲羽客荷衣義扇正從容

少司空張廷璩桓臣

從古蓬萊不計年誰將甲子問神仙世人自要蟠桃喫  
泥請先生介壽筵

暫別華陽入帝州金門仙客本儒流瑶觴擲後閒遊  
戲識取星官姓是婁

朝元寶殿領光明妙正銜高方外卿咫尺霞樓未相訪  
松風縹緲聽吹笙余居近光明殿

不講丹經靜自修調風燮雨助嘉庥也教海屋遙相記



最少新添五百籌

侍讀學士鄒升恆

慎齋

西華門內朝天宮金碧照耀樓臺重烟雲人世幾遷換  
古井尚蘊丹砂紅中有真人誦黃庭見素抱朴含幽貞  
淵默之中吐竒怪揮斥八極驅風霆不須餐霞煮白石  
松姿霍骨宜千齡況有天書標五色樹影千宮共槐棘  
河圖中數握真樞大衍迴環歸太極洞中神仙何足異  
山中宰相誰能識正遇貞觀全盛時祝君便是婁師德

內閣學士許王猷

賓穆

應是壺中別有家藜床相勸飯胡麻園中認葉分靈草



青  
席上餘杯對早花已掃書齋安藥竈自添文火養丹砂  
幽人住處無名利春去春來任物華

少司寇勵宗萬衣園

藥珠宮殿倚雲寒許掾居然道氣完庭畔自馴千歲雀  
囊中剩有九還丹定邀王子餐麟脯應笑文成食馬肝  
更羨玉皇曾賜號恩輝此日照瑤壇

內閣學士汪由敦

師茗

紫氣東來滿上清蕭蕭雀氅稱閒情琳書彩爛輝金字  
瓊闕樓高接玉京久識茅君身有骨何勞宗遠說無聲  
一天法雨勤揮洒默契宸衷錫令名



少司農梁詩正

薌林

霓裳羽蓋小春天想見茅君破腋年九氣明來瞳遂異  
七蕤鍵後齒常堅閒憑午枕消殘暑早識前塵落幻緣  
寧似韋公歸較晚未應松菊笑迂仙  
姑射峯前養獨全五千真諦是心傳止啼不必曾通佛  
得解何妨更著元一劍朝飛湖水濶雙鳬夜落斗杓旋  
生平甲子憑誰識眼底山楓又欲然

少冢宰陳大受可齋

金紫神仙侶元都富貴人西池叅妙訣南極燦星辰倚  
崔隨舒嘯猶龍任屈伸聖人欣論道天子樂嘉賓



法篆榮青瑣丹符重紫宸問年同大衍朝野賀長春

殷元于 振雀泉

太上黃庭外景篇揚州上應天市垣牽牛婺女標星躔  
震澤八百銀河翻九峯三泖浮雲間苕溪雪溪滙百川  
南峯北峯飛來前精靈孕毓出妙門是生偉人繼法筵  
道非常道元之元朱衣絳節錫帝閭白鳳拊翼青鸞騫  
光明之殿惟德園肉芝瑤草日月閑調伏龍虎如蚯蚓  
坎離鉛汞探真源函關纍纍五千言無爲清靜法自然  
丹邱甲子無歲年大衍五十何茈茈從此馭氣遊崑崙  
便欲嬰兒視彭錢我方屈曲在人寰亦有仙骨無仙緣



朝天歸來醉即眠如我何必非神仙

殿元彭啓豐

翰文

紫府清修碧落聞曙鐘星斗露盤雲青鸞仙使千年集  
瑤草靈光五色耘汗漫本期偕桂父逍遙應共禮茅君  
經樓若許探真誥仙籙長生也得分

兵備道莊

柱書石

淑氣多鍾瑤島邊仙家牒本繫星躔珊珊雀羽雲間翥  
燦燦鸞書天府傳養就九還丹吐焰携來千頃雨成川  
佑民福國功施溥大德須教享大年

紺碧樓臺晃眼新光明洞達迴無塵靜探寶笈三千卷



閒賞名花五十春  
道法西江畱正訣  
詩篇東壁集奇珍  
只予匆遽錢塘棹  
里句遙憑錦鯉陳

御史劉方藹

蘭谷

名在丹臺上清修  
服氣身薊燕今法  
座吳越舊山人妙  
正朝端號光明殿  
裏賓遊仙騏驥崔  
高蹈斗牛津履下  
飛無跡壺中別有  
春洞宮花頃刻靈  
宅酒逡巡蓬島樓  
千劫乾坤養一真  
不須推甲子何用  
守庚申

都諫倪國璉

穉疇

九日茱萸佩言尋  
費長房截虹傾法  
雨招崔駐靈光紫  
綬晨朝斗青詞夜  
拜章恰逢行道處  
不斷菊花香



仙甲原無量籌添五位中  
兩朝崇妙道六宇暢元風

靈藥從初轉華芝發幾叢共瞻金頂瑞日麗紫雲籠

光明

殿金頂放光法侶夏蓮溪先生  
爲予言曾親見之經時不散

殿元莊有恭容可

悠悠仙訣見元根象外能通衆妙明金虎白鴉丹獨鍊

香園善水道常存

雲裝瀟灑儼真仙噓氣應成五色烟何事餐霞誇絕粒

人間早證蔚藍天

附知非贈言終



（The main body of the page contains multiple vertical columns of text, which are extremely faint and mostly illegible due to fading or bleed-through from the reverse side. The text appears to be organized into approximately 12 columns within the main frame.)







